

9. august 2021

UKA2021/50

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Illup sananeqarneranut akiusup minnerpaaffissaata ¹ inatsisitigut aalajangersarneqartup appartinneratigut pisortat inissiaataanni attartortittakkani ineqarnermut akiliutip appartinneqarnissaanut periarfissat misissoqqullugit Naalackersuisut peqquneqarnissaannik Inatsisartut aalajangiiffigisassaattut siunnersuut. Misissuinikkut ineqarnermut akiliutip, illup sananeqarneranut akiusup, piginnittut aningaasaliissutinit iluanaarutissaasa aammalu ineqarnermut tapiissutit allanngornerisa imminnut ataqatigiinnerat paasinarsisinneqassapput kiisalu aserfallatsaaliinissamut pilersaarutit attatiinnarneqarnissaat isiginiarneqassalluni. Kiisalu illup illuutit sananeqarneranni naliusup ingerlaavartumik nalikillilerneqartarnerani pitsaaqutit ajoqutillu misissuinikkut qulaajarneqassapput. Misissuinerup inerneru Inatsisartunut kingusinnerpaamik juli 2022-mi agguanneqassapput.

(Inatsisartunut ilaasortaqa Erik Jensen, Siumut)

Tunngavilersuut:

Inissiat pisoqaaqisut ukiorpassuarnilu nutarterneqarsimangittut attartornermut akiisa qaffasippallaarnerat arajutsisimangilarput. Taamaattumik immiut aperisimavunga, qanoq iliorluni inissiat pisortat attartortitagaasa attartornerinut akiisa qanoq ililluni annikillisinneqarsinnaanersut.

Inissianik attartortitsisarneq pillugu Inatsisartut peqqussutaat nr. 2, 12. maj 2005-imeersumi § 31 imm. 2-mi ullumikkut kr. 7.000,-isup kr. 3.500,-imut appartinneqarnissaa kiisalu § 32 imm. 8-p peerneqarnissaa periarfissaasunut ilaasortaqaq oqaatigissavara.

Eqqortuusinnaangilarmi Namminersorlutik Oqartussat inissiaataasa soorlu ilaatigut najugaqarfinni taakkartukkanni ilaatigut ineqarnermut qaammammut kr. 7 - 8.000,- angullugit, ukiorpassuani akeqartinneqarnerat, illuatungaanilu aserfallatsaaliorneqarnerat pitsanngorsarneqartarnerallu tamakkiisumik suliarineqassanani.

Aammattaq politikikkut anguniagaajuartarpoq innuttaasut amerlanerpaat namminneq pigisaminnik illoqalernissaat. Innuttaasulli illutaarnissamimmu ileqqaarilersinnaangussappata, isumaqarpunga ineqarnermut akit appaaffigineqartariaqartut taamaasilluni innuttaasut kaarfii imaqarnerulersinneqartariaqartut. Tassa aningaasaliissutit iluanaarutaat piginnittunut utertinneqartartup (kapitalafkastip) appartinneqarneratigut ineqarnermut akiliutip appartinneqarsinnaapput. Inissiammi nutaangiliartornerat malillugu akit aamma nalimmassarneqartariaqarput. Inissiat naalagaaffimminngaanniik kingornussimasat ullumikkut aserfallassimaqisut Namminersorlutik Oqartussat inissiaataat ullumikkumut naleqqunnerusunngorlugit akilersorneqarnissaat pisariaqalerpoq.

¹ Inissianik attartortitsisarneq pillugu Inatsisartut peqqussutaat nr. 2, 12. maj 2005-imeersoq

Inissiani pisortat attartortittagaanni najugaqartut malunnaatilimmik inissiamik attartornerminnik akiliutigisartagaat appartissinnaavarput. Appartikkutsigulu attartortut aningaasateqarnerulaaler-nissaat angusinnaassallutigut. Attartortut nammineq inissiamik pisinissaminnut katersinissaminnut periarfissaqarnerulaalissapput imaluunniit allanut pisariaqartitaminnut aningaasassaqarnerulaalissallutik.

Erseqqissaatigissavaralu inissianik attartortittakkanik piginnit assigiinngitsuusarmata. Tassa ilaat kommuniniit piginetarput aammalu akisussaaffigineqartut. Taamaattumik uani inatsimmi Namminersorlutik Oqartussat inissiaataannut nutaannginnerusuni najugalinnut, naalagaaffimmiit tiguneqarsimasunut annerusumik sunniuteqartussaalluni.

Siunnersuutip aningaasatigut allaffissornikkullu pisortanut kinguneqaatissai
Misissuinissap annertussusaa misingersorneqarpoq AC ataaseq ukioq ataaseq atorneqassasoq tamannalu 500.000 kr. missaanni naleqarpoq.

Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai

Soqanngilaq

Siunnersuutip innuttaasunut allaffissornikkut aningaasatigullu kinguneqaatissai
Soqanngilaq